



REPUBLIKA E SHQIPËRISË

KOMISIONERI PËR TË DREJTËN E INFORMIMIT DHE MBROJTJEN E TË  
DHËNAVE PERSONALE

DREJTORIA E HETIMIT ADMINISTRATIV

Nr. 928/14 prot.

Tiranë më 14.9.2017

URDHËR

Nr. 225, datë 14.9.2017

PËR

**SHKATËRRIMIN E TË DHËNAVE PERSONALE, TË CILAT KANË  
TEJKALUAR AFATIN LIGJOR TË PËRPUNIMIT**

Baza Ligjore: Ligji Nr.9887, datë 10.03.2008, "Për Mbrojtjen e të Dhënave Personale", i ndryshuar, nenet 29 dhe 30 të tij.

Në zbatim të Urdhrit Nr.163, datë 15.06.2017 të Komisionerit për të Drejtën e Informimit dhe Mbrojtjen e të Dhënave Personale, u krye hetim administrativ pranë kontrolluesit "Ndihma e Weilheimit për Shqipërinë" Elbasan, me objekt kontrolli:

- Zbatimi i Ligjit Nr.9887 datë 10.03.2008 "Për mbrojtjen e të dhënave personale" i ndryshuar dhe akteve të miratuara nga Komisioneri, në lidhje me mbledhjen, përpunimin, ruajtjen dhe sigurinë e të dhënave personale, gjatë kryerjes së aktivitetit të kontrolluesit "Ndihma e Weilheimit për Shqipërinë" Elbasan.

Grupi i kontrollit, gjatë kryerjes së veprimeve procedurale, u asistua nga përfaqësuesit e kontrolluesit, të cilët ishin njohur me Urdhrit Nr.163, datë 15.06.2017 të Komisionerit.

Kontrolluesi "Ndihma e Weilheimit për Shqipërinë" Elbasan, është subjekt juridik me NIPT:J622140011, me aktivitet shërbimin social të përkujdesit për fëmijët jetimë dhe atyre me probleme sociale, për moshat 14-18 vjeç. Ky kontrollues, gjatë ushtrimit të veprimtarisë së tij përpunon të dhëna personale për subjektet e të dhënave "punëmarrës" e "fëmijë".

**Nga hetimi administrativ i kryer pranë këtij kontrolluesi, sipas proces verbalit të mbajtur për këtë qëllim u konstatua:**

1. Kontrolluesi "Ndihma e Weilheimit për Shqipërinë" Elbasan, nuk ka kryer detyrimin për njoftim pranë Zyrës së Komisionerit.  
Konstatimi i pikës 1 të këtij procesverbalit, përbën shkelje të nenit 21 dhe 22 të Ligjit Nr.9887, datë 10.03.2008, "Për Mbrojtjen e të Dhënave Personale" i ndryshuar.

2. Kontrolluesi “*Ndihma e Weilheimit për Shqipërinë*” Elbasan, nuk disponon rregullore për mbrojtjen e të dhënave personale.  
Konstatimi i pikës 2 të këtij procesverballi, përbën shkelje të nenit 27 të Ligjit Nr.9887, datë 10.03.2008, “*Për Mbrojtjen e të Dhënave Personale*” i ndryshuar.
3. Kontrolluesi “*Ndihma e Weilheimit për Shqipërinë*” Elbasan, në arkivën e tij, ka të grumbulluara dosje të cilat datojnë që në fillimet e veprimtarisë së tij, viti 1992. Konstatimi i pikës 3 të këtij procesverballi, përbën shkelje të nenit 5, germa “d” të Ligjit Nr.9887, datë 10.03.2008, “*Për Mbrojtjen e të Dhënave Personale*” i ndryshuar:

*“1.Mbrojtja e të dhënave personale bazohet:*

*d) në mbajtjen në atë formë, që të lejojë identifikimin e subjekteve të të dhënave për një kohë, por jo më tepër se sa është e nevojshme për qëllimin, për të cilin ato janë grumbulluar ose përpunuar më tej”.*

4. Kontrolluesi “*Ndihma e Weilheimit për Shqipërinë*” Elbasan, nuk aplikon “*Deklaratë Konfidencialiteti*” me punëmarrësit, të cilët kanë akses në mbledhjen, përpunimin dhe ruajtjen e të dhënave personale. Ky detyrim duhet të materializohet me standardin e Deklaratës së Konfidencialitetit sipas Vendimit Nr.6 datë 05.08.2013 të Komisionerit, ku parashikohen: **Objekti, qëllimi, fusha e veprimit, masat për shpërdorimin e tyre, si dhe nënshkrimin e punëdhënësit.**

Konstatimi i pikës 4 të këtij procesverballi, përbën shkelje të nenit 28 të Ligjit Nr.9887, datë 10.03.2008, “*Për Mbrojtjen e të Dhënave Personale*” i ndryshuar.

Pika 3 e procesverballit, konsiston në mbajtjen e dosjeve me të dhëna personale sensitive të përfituesve, *më tepër se sa është e nevojshme për qëllimin, për të cilin ato janë grumbulluar ose përpunuar më tej.* Këto dosje, përmbajnë të dhëna me karakter vetjak dhe sensitiv, të cilat cenojnë jetën private të fëmijëve kur ato mbahen, në afate të papërcaktuara edhe pasi ka mbaruar qëllimi për të cilin këto të dhëna janë mbledhur.

Zyra e Komisionerit pas përfundimit të procedurës së kontrollit, ka dalë me aktin rekomandues, Nr.35, datë 25.07.2017 në lidhje me shkeljet, sipas pikave të procesverballit të mësipërm, ku ndër të tjera shprehet:

“Në zbatim të nenit 5, germa “d” të Ligjit Nr.9887, datë 10.03.2008 “*Për Mbrojtjen e të Dhënave Personale*” i ndryshuar, kontrolluesi “*Ndihma e Weilheimit për Shqipërinë*” Elbasan, të parashikojë në rregulloren për “*Mbrojtjen, Përpunimin, Ruajtjen dhe Sigurinë e të Dhënave Personale*”, afatet ligjore të ruajtjes së të dhënave personale (dosjet) e përfituesve (fëmijëve)”.

Neni 3 “*Përkufizime*”, pika 4 i Ligjit Nr.9887, datë 10.03.2008, “*Për Mbrojtjen e të Dhënave Personale*” i ndryshuar, përcakton se:

“*Të dhëna sensitive*” është çdo informacion për personin fizik, që ka të bëjë me origjinën e tij, racore ose etnike, mendimet politike, anëtarësimin në sindikata, besimin, fetar apo filozofik, dënimin penal, si dhe të dhëna për shëndetin dhe jetën seksuale”.

Zyra e Komisionerit vlerëson rëndësinë e mbrojtjes së të dhënave personale, konkretisht të fëmijëve, përpunimi i paligjshëm i të cilave sjell pasoja të pariparueshme të jetës dhe privatësisë së tyre. E drejta e tyre për privatësi sanksionohet gjithashtu, në nenin 17 të Ligjit Nr.18/2017, "Për të Drejtat dhe Mbrojtjen e Fëmijës", pika 2 citon:

*"2. Privatësia e fëmijës mbrohet në të gjitha situatat, përfshirë ato brenda familjes, institucioneve të kujdesit shëndetësor, shoqëror e të shërbimeve. Kjo e drejtë përfshin privatësinë e marrëdhënieve e të komunikimeve me të tjerët, të drejtën për këshillim konfidencial, kontrollin e aksesit në informacionin që ruhet për fëmijët në dosjet përkatëse".*

Ruajtja e dosjeve të fëmijëve, pa një afat të caktuar edhe pasi ka mbaruar qëllimi për të cilin ato janë mbledhur, përbën shkelje të kësaj të drejte themelore të tyre.

Në konsultimet paraprake që Zyra e Komisionerit ka zhvilluar me palët e interesuara, është konkluduar se afati i mbajtjes së dosjeve të "përfitueseve" apo "fëmijëve", nuk duhet të jetë më shumë se 10 vjet nga dalja e "përfitueseve" apo "fëmijëve", prej qendrës, duke marrë parasysh dhe monitorimin afatgjatë të tyre pas daljes nga qendra e trajtimit.

Neni 30, paragrafi 1, germa "b" e Ligjit Nr.9887, datë 10.03.2008 "Për Mbrojtjen e të Dhënave Personale" i ndryshuar, përcakton se:

*"Komisioneri ka këto të drejta:*

*b) urdhëron bllokimin, fshirjen, shkatërrimin ose pezullon përpunimin e paligjshëm të të dhënave personale".*

Sa më sipër, në zbatim të neneve 5, 7, 29, 30 pika 1, germa "b" dhe 32 të Ligjit Nr.9887, datë 10.03.2008 "Për Mbrojtjen e të Dhënave Personale" i ndryshuar,

#### **URDHËROJ:**

1. Kontrolluesi "Ndihma e Weilheimit për Shqipërinë" Elbasan, të realizojë në mënyrë të menjëhershme, pezullimin e përpunimit të të dhënave personale (dosjet) e subjekteve të të dhënave, kategoria "fëmijë", që kanë mbi 10 vjet nga përfundimi i qëllimit për të cilin janë mbledhur.
2. Kontrolluesi "Ndihma e Weilheimit për Shqipërinë" Elbasan, të parashikojë në rregulloren për "Mbrojtjen, Përpunimin, Ruajtjen dhe Sigurinë e të Dhënave Personale", afatin 10 vjeçar të mbajtjes së dosjeve me të dhëna personale kategoria "fëmijë", pas daljes së tyre nga qendra e trajtimit.
3. Kontrolluesi "Ndihma e Weilheimit për Shqipërinë" Elbasan, të realizojë seleksionimin e dosjeve që disponon, deri në klasifikimin dhe verifikimin e saktë të tyre si:
  - a. Të dhëna personale (dosje) të ruajtura në përputhje me afatet ligjore.
  - b. **Të dhëna personale (dosje) të ruajtura në shkelje të afateve ligjore.**
4. Kontrolluesi "Ndihma e Weilheimit për Shqipërinë" Elbasan, pasi të ketë vepruar sipas pikave 1, 2 dhe 3 të këtij urdhri, të realizojë shkatërrimin e të gjitha të dhënave

personale sensitive (dosje) të arkivuara në kundërshtim me afatet ligjore, brenda një periudhe 60 (gjashtëdhjetë) ditore.

5. Kontrolluesi "Ndhima e Weilheimit për Shqipërinë" Elbasan, mbart detyrimin për të njoftuar Zyrën e Komisionerit, lidhur me zbatimin e detyrave të lëna në këtë urdhër, brenda 60 ditëve.
6. Në rast mospërbushje të këtij detyrimi, Komisioneri vepron sipas nenit 30/2 dhe 39 të Ligjit Nr.9887, datë 10.03.2008 "Për Mbrojtjen e të Dhënave Personale" i ndryshuar. Komisioneri në rast shkeljesh serioze të përsëritura ose të qëllimshme të ligjit nga një kontrollues ose përpunues, veçanërisht në rastet e përsëritura të rekomandimeve të tij, vendos sanksion administrativ me gjobë dhe e denoncon publikisht ose e raporton çështjen në Kuvend dhe në Këshillin e Ministrave.

Ky urdhër u shpall sot më, 14/9 /2017

**KOMISIONERI**

**Besnik Dervishi**

